



Takornariaqarneq aallaavigalugu ilinniarfusinnaasumik Ilulissani ilinniartoqarfimmik pilersitsinissamut aalajangiisoqarsinnaanissaanut tunngavissanik Naalakkersuisut misissuinissaat pillugu Inatsisartut aalajangiiffigisassaattut siunnersuut. Ilinniartoqarfik minnerpaamik serviceøkonom, Arktisk Turistguide aamma Adventure Guide ilinniakkatut pigissavai. Misissuineq kingusinnerpaamik UKA 2023-mi Inatsisartunut tunniunneqassaaq.

(Inatsisartunut ilaasortaq Nivi Olsen, Demokraatit)

Siullermeerineq:

Naleqqamiit aalajangiiffigisassatut siunnersuut pillugu Inatsisartuni ilaasortaq Nivi Olsen, Demokraatit, siunnersuutaanut soqutiginaratumut pisariaqartumullu qutsavigerusupparput, siunnersuutaanullu imatut Naleqqamiit imatut siunnersuut oqaaseqaateqarfigissavarput.

Siunnersuut imaqarpoq Ilulissani ilinniarfimmik pilersitsinissaq pillugu misissuineramik suliaqartoqassasoq, misissuinermilu takornariaqarnermut tunngasut ilinniarfiit qitiutinneqassasut siunnersuummi maluginiagassaavoq.

Avannaani takornariaqarfissuuvoq Ilulissat aammalu periarfissarpassuaqarpoq nunaqavissunut ineri-sagassanik inerisaaffigeqqittariaqartunillu periarfissanik ulikkaarpoq taamatullu Mittarfik sanaartor-neqartoq naammassippat avataaniit toqqaannartumik avannaani isaavik pilersinneqartussaavoq piareersarfigisariaqartoq naleqqussaaffigisariaqartorlu piffissaq aggersoq utaqqeqaarnagu qitiusumiit aamma piareersaaffigisariaqarlunnartoq.

Avannaani ilinniartitaanikkut inerisaanissaq pisariaqarlunnartuuvoq, ilinniartitaanikkut aningaasaliinerit siunissami nunatsinnut aningaasarsiornikkut iluaqutaalersussaammata siunissamut aningaasaliinertut taasariaqarlunnartuupput minnerunngitsumik Avannaani takornariaqarneq aallaavigalugu ilinniarfimmik pilersitsineq siunissamut aningaasaliinerussammat Naleqqamiit siunissamut



aningaasaliinissamut aqputaasussamik qulaajaanissaq pilersititsinissarlu tamakkiisumik taperse-ratsigu oqaatigissavarput.

Ilinniarsimassuseq aammalu ilisimasaqarluarneq tassaavoq nukik annerpaaq siunissami atugassarput inerisagassarpullu siunissami nunarsuarmioqatitsinnut unammillerluarsinnaasumik inissisimalernis-satsinnut aqputissat pingaarnersaasa ilaat.

Takornariaqarnikkut nunaqavissut taamatullu ingerlataqartut pitsaanerpaamik avannaani inissisi-malissappata tassa suliassarpasuit ilagiinnarpaat ilinniarfeqalernissaq, tamannalu nunatta aningaa-sarsiorneranut iluaqutaalersussaasutut siunnerfigineqartoq inerisaaffigisariaqarluinnartoq Naleq-qamiit isumaqarfigaarput.

Taamaammallu Naalakkersuisut akissuteqarnerminni siunnersuut itigartinnagu allannguutissamik siunnersuuteqarlutik siunnersuuteqartup ujartugai pillugit avannaani tassalu Ilulissani ilinniarfim-mik pilersitsinissaq pillugu Naalakkersuisut misissuineramik suliaqartussanngorlugu siunnersuutaat Naleqqamiit tigulluarparput, tamatumalu suliap Upernaakkut 2023-imi saqqummiunneqartussamut qilanaalereerpugut.

Ilulissani ilinniarfimmik pilersititsinissaq pillugu Naalakkersuisut taamatut siunnerfeqarnissaat ta-persersorlutigu taamatut Naleqqamiit oqaaseqarfigaarput, sulianut ingerlareersunut ilanngullugu su-liarineqartussanngornera taperse-lutigu.

“Ilulissani ilinniarfimmik pilersitsinissaq pillugu Naalakkersuisut misissuineramik suliaq-qullugit peqquneqarnissaanik Inatsisartunut aalajangüffigisassatut siunnersuut. Ilinniarfiup minnerpaamik ilinniakkat Serviceøkonom, Arktisk Turistguide aamma Adventure Guide neqeroorutigissavai. Misissuineq immikkoortoq 95-imut aamma immikkoortoq 107-imut mis-suinermut ingerlareersumut ilaassaaq, kingusinnerpaamillu Inatsisartut 2023-mi upernaakkut ataatsimüilerpata tunniunneqassalluni.”